

金剛三昧經

佛教正覺同修會 恭印

公元二〇二四年十二月四千二百冊

《金剛三昧經》

卷上

北京 失譯人名

〈序品〉 第一

如是我聞：一時佛在王舍大城耆闍崛山中，與大比丘眾一萬人俱，皆得阿羅漢道，其名曰舍利弗、大目犍連、須菩提，如是眾等阿羅漢；復有菩薩摩訶薩二千人俱，其名曰解脫菩薩、心王菩薩、無住菩薩，如是等菩薩；復有長者八萬人俱，其名曰梵行長者、大梵長者、樹提長者，如是等長者；復有天、龍、夜叉、乾闥婆、阿修羅、迦樓羅、緊那羅、摩睺羅伽、人非人等六十萬億。

爾時，尊者大眾圍遶，爲諸大眾說大乘經，名一味真實無相無生決定實

際本覺利行。若聞是經，乃至受持一四句偈，是人則爲入佛智地，能以方便教化眾生，爲一切眾生作大知識。佛說此經已，結加趺坐，即入金剛三昧，身心不動。爾時，眾中有一比丘，名曰阿伽陀，從座而起，合掌胡跪，欲宣此義，而說偈言：「

大慈滿足尊，智慧通無礙，廣度眾生故，說於一諦義。
皆以一味道，終不以小乘，所說義味處，皆悉離不實。
入諸佛智地，決定真實際，聞者皆出世，無有不解脫。
無量諸菩薩，皆悉度眾生，爲眾廣深問，知法寂滅相。
入於決定處，如來智方便，當爲入實說，隨順皆一乘。
無有諸雜味，猶如一雨潤，眾草皆悉榮，隨其性各異。
一味之法潤，普充於一切，如彼一雨潤，皆長菩提芽。
入於金剛昧，證法真實定，決定斷疑悔，一法之印成。」

《無相法品》第二

爾時，尊者從三昧起，而說是言：「諸佛智地入實法相，決定性故，方便神通皆無相利。一覺了義難解難入，非諸二乘之所知見，唯佛菩薩乃能知之，可度眾生皆說一味。」

爾時，解脫菩薩即從座起，合掌胡跪而白佛言：「尊者！若佛滅後，正法去世、像法住世，於末劫中，五濁眾生多諸惡業，輪迴三界無有出時。願佛慈悲，爲後眾生宣說一味決定真實，令彼眾生等同解脫。」佛言：「善男子！汝能問我出世之因，欲化眾生，令彼眾生獲得出世之果。是一大事不可思議，以大慈故、以大悲故，我若不說即墮慳貪。汝等一心諦聽，爲汝宣說。善男子！若化眾生，無生於化，不生無化，其化大焉。令彼眾生皆離心我，一切心我本來空寂，若得空心，心不幻化。無幻、無化即得無生，無生之心在於無化。」

解脫菩薩而白佛言：「尊者！眾生之心性本空寂，空寂之心體無色相。云

何修習得本空心？願佛慈悲爲我宣說。」佛言：「菩薩！一切心相本來無本，本無本處空寂無生；若心無生即入空寂，空寂心地即得心空。善男子！無相之心無心無我，一切法相亦復如是。」

解脫菩薩而白佛言：「尊者！一切眾生若有我者、若有心者，以何法覺，令彼眾生出離斯縛？」佛言：「善男子！若有我者，令觀十二因緣。十二因緣本從因果，因果所起興於心行。心尚不有，何況有身？若有我者，令滅有見；若無我者，令滅無見。若心生者，令滅生性；若心滅者，令滅滅性。滅是見性，即入實際，何以故？本生不滅、本滅不生，不滅不生、不生不滅，一切法相亦復如是。」

解脫菩薩而白佛言：「尊者！若有眾生見法生時，令滅何見？見法滅時，令滅何見？」佛言：「菩薩！若有眾生見法生時，令滅無見；見法滅時，令滅有見。若滅是見得法真無，入決定性決定無生。」

解脫菩薩而白佛言：「尊者！令彼眾生住於無生，是無生也。」佛言：「住於無生即是有生。何以故？無住無生，乃是無生。菩薩！若生無生，以生滅

生，生滅俱滅，本生不生。心常空寂，空性無住，心無有住乃是無生。」

解脫菩薩而白佛言：「尊者！心無有住有何修學？爲有學耶、爲無學耶？」佛言：「菩薩！無生之心，心無出入，本如來藏性寂不動，亦非有學，亦非無學。無有學不學，是即無學；非無有學，是爲所學。」

解脫菩薩而白佛言：「尊者！云何如來藏性寂不動？」佛言：「如來藏者，生滅慮知相，隱理不顯，是如來藏性寂不動。」

解脫菩薩而白佛言：「尊者！云何生滅慮知相？」佛言：「菩薩！理無可不。若有可不，即生諸念，千思萬慮，是生滅相。菩薩！觀本性相理自滿足，千思萬慮不益道理，徒爲動亂，失本心王。若無思慮，則無生滅。如實不起，諸識安寂，流注不生，得五法淨，是謂大乘。菩薩！入五法淨，心即無妄；若無有妄，即入如來自覺聖智之地；入智地者，善知一切從本不生；知本不生，即無妄想。」

解脫菩薩而白佛言：「尊者！無妄想者，應無止息。」佛言：「菩薩！妄本不生，無妄可息；知心無心，無心可止。無分無別，現識不生；無生可止，

是則無止，亦非無止。何以故？止無止故。」

解脫菩薩而白佛言：「尊者！若止無止，止即是生，何謂無生？」佛言：「菩薩！當止是生，止已無止，亦不住於無止，亦不住於無住，云何是生？」解脫菩薩而白佛言：「尊者！無生之心，有何取捨？住何法相？」佛言：「無生之心，不取不捨；住於不心，住於不法。」

解脫菩薩而白佛言：「尊者！云何住於不心、住於不法？」佛言：「不生於心，是住不心；不生於法，是住不法。善男子！不生心法，即無依止。不住諸行，心常空寂，無有異相。譬彼虛空無有動住，無起無作，無彼無此；得空心眼，得法空身，五陰六入悉皆空寂。善男子！修空法者，不依三界，不住戒相；清淨無念，無攝無放；性等金剛，不壞三寶；空心不動，具六波羅蜜。」

解脫菩薩而白佛言：「尊者！六波羅蜜者，皆是有相。有相之法，能出世也？」佛言：「善男子！我所說六波羅蜜者，無相無爲；何以故？善入離欲，心常清淨，實語方便，本利利人，是檀波羅蜜。至念堅固，心常無住，清淨

無染，不著三界，是尸波羅蜜。修空斷結，不依諸有，寂靜三業，不住身心，是羼提波羅蜜。遠離名數，斷空有見，深入陰空，是毘梨耶波羅蜜。俱離空寂，不住諸空，心處無住，不住大空，是禪波羅蜜。心無心相，不取虛空，諸行不生，不證寂滅；心無出入，性常平等，諸法實際，皆決定性，不依諸地，不住智慧，是般若波羅蜜。」

「善男子！是六波羅蜜者，皆獲本利，入決定性，超然出世，無礙解脫。善男子！如是解脫法相，皆無相行，亦無解不解，是名解脫。何以故？解脫之相，無相無行、無動無亂，寂靜涅槃，亦不取涅槃相。」解脫菩薩聞是語已，心大欣懌，得未曾有，欲宣義意，而說偈言：「

大覺滿足尊，爲眾敷演法，皆說於一乘，無有二乘道。
一味無相利，猶如太虛空，無有不容受，隨其性各異。
皆得於本處，如彼離心我，一法之所成，諸有同異行。
悉獲於本利，滅絕二相見，寂靜之涅槃，亦不住取證。
入於決定處，無相無有行，空心寂滅地，寂滅心無生。

同彼金剛性，不壞於三寶，具六波羅蜜，度諸一切生。

超然出三界，皆不以小乘，一味之法印，一乘之所成。」

爾時，大眾聞說是義，心大欣懌，得離心我，入空無相，恢廓曠蕩，皆得決定，斷結盡漏。

〈無生行品〉第三

爾時，心王菩薩聞佛說法，出三界外不可思議，從座而起，叉手合掌，以偈問曰：「

如來所說義，出世無有相。可有一切生，皆得盡有漏？

斷結空心我，是則無有生。云何無有生，而得無生忍？」

爾時，佛告心王菩薩言：「善男子！無生法忍法本無生，諸行無生非無生行，得無生忍即爲虛妄。」心王菩薩言：「尊者！得無生忍即爲虛妄，無得無忍應非虛妄。」佛言：「不也。何以故？無得無忍是則有得，有得有忍是則有

生。有生於得，有所得法，並爲虛妄。」

心王菩薩言：「尊者！云何無忍無生心而非虛妄？」佛言：「無忍無生心者，心無形段，猶如火性雖處木中，其在無所，決定性故。但名但字，性不可得，欲詮其理假說爲名，名不可得；心相亦爾，不見處所，知心如是，則無生心。」

「善男子！是心性相又如阿摩勒果，本不自生，不從他生，不共生，不因生，不無生。何以故？緣代謝故。緣起非生，緣謝非滅；隱顯無相，根理寂滅。在無有處、不見處所住，決定性故。是決定性，亦不一不異，不斷不常，不入不出，不生不滅；離諸四謗，言語道斷，無生心性亦復如是。云何說生不生、有忍無忍？若有說心有得有住及以見者，即爲不得阿耨多羅三藐三菩提；是爲長夜了別心性者，知心性如是；性亦如是，是無生行。」

心王菩薩言：「尊者！心若本如無生於行，諸行無生。生行不生，不生無行，即無生行也。」佛言：「善男子！汝以無生而證無生行也？」心王菩薩言：「不也。何以故？如無生行，性相空寂，無見無聞，無得無失，無言無說，無

知無相，無取無捨，云何取證？若取證者，即爲諍論。無諍、無論，乃無生行。」佛言：「汝得阿耨多羅三藐三菩提也。」

心王菩薩言：「尊者！我無得阿耨多羅三藐三菩提。何以故？菩提性中無得無失，無覺無知，無分別相，無分別中即清淨性；性無間雜，無有言說，非有非無，非知非不知；諸可法行亦復如是，何以故？一切法行，不見處所，決定性故。本無有得不得，云何得阿耨多羅三藐三菩提？」

佛言：「如是！如是！如汝所言，一切心行，不過無相，體寂無生，所有諸識亦復如是，何以故？眼、眼觸悉皆空寂，識亦空寂，無有動、不動相，內無三受，三受寂滅；耳、鼻、舌、身、心意，意識及以末那、阿梨耶識，亦復如是皆亦不生寂滅心及無生心。若生寂滅心，若生無生心，是有生行，非無生行。菩薩內生三受、三行、三戒，若已寂滅，生心不生。心常寂滅，無功無用，不證寂滅相，亦不住於無證，可處無住。總持無相，即無三受等三，悉皆寂滅清淨無住，不入三昧、不住坐禪，無生、無行。」

心王菩薩言：「禪能攝動，定諸幻亂。云何不禪？」佛言：「菩薩禪即是

動，不動不禪是無生禪。禪性無生，離生禪相；禪性無住，離住禪動。若知禪性無有動靜，即得無生；無生般若亦不依住，心亦不動；以是智故，故得無生般若波羅蜜。」

心王菩薩言：「尊者！無生般若，於一切處無住，於一切處無離、心無住處，無處住心無住無心，心無生住；如此住心，即無生住。尊者！心無生行不可思議！不思議中不可說！」佛言：「如是，如是。」心王菩薩聞如是言，歎未曾有，而說偈言：「

滿足大智尊，廣說無生法，聞所未曾聞，未說而今說。

猶如淨甘露，時時乃一出，難遇難思議，聞者亦復難。

無上良福田，最上勝妙藥，爲度眾生故，而今爲宣說。」

爾時，眾中聞說此已，皆得無生無生般若。

〈本覺利品〉第四

爾時，無住菩薩聞佛所說一味真實不可思議，從遠近來，親如來座，專

念諦聽，入清白處，身心不動。

爾時，佛告無住菩薩言：「汝從何來？今至何所？」無住菩薩言：「尊者！我從無本來，今至無本所。」佛言：「汝本不從來，今亦不至所。汝得本利不可思議，是大菩薩摩訶薩。」即放大光遍照大千界，而說偈言：「

大哉菩薩！智慧滿足；常以本利，利益眾生。

於四威儀，常住本利，導諸群庶，不來不去。」

爾時，無住菩薩而白佛言：「尊者！以何利轉而轉眾生一切情識入庵摩羅？」佛言：「諸佛如來常以一覺而轉諸識入庵摩羅。何以故？一切眾生本覺，常以一覺覺諸眾生，令彼眾生皆得本覺，覺諸情識空寂無生。何以故？決定本性，本無有動。」

無住菩薩言：「可一切識皆緣境起，如何不動？」佛言：「一切境本空，一切識本空，空無緣性，如何緣起？」無住菩薩言：「一切境空，如何言見？」佛言：「見即爲妄，何以故？一切萬有無生無相，本不自名，悉皆空寂；一切法相亦復如是，一切眾生身亦如是。身尚不有，云何有見？」無住菩薩言：

「一切境空，一切身空，一切識空，覺亦應空。」佛言：「可一覺者，不毀不壞，決定性故，非空非不空，無空不空。」無住菩薩言：「諸境亦然，非空相、非無空相。」佛言：「如是！彼可境者，性本決定，決定性根，無有處所。」無住菩薩言：「覺亦如是，無有處所。」佛言：「如是！覺無處故清淨，清淨無覺；物無處故清淨，清淨無色。」

無住菩薩言：「心、眼、識亦復如是。不可思議！」佛言：「心、眼、識亦復如是，不可思議！何以故？色無處所，清淨無名，不入於內；眼無處所，清淨無見，不出於外；心無處所，清淨無上，無有起處；識無處所，清淨無動，無有緣別，性皆空寂；性無有覺，覺則爲覺。善男子！覺知無覺，諸識則入。何以故？金剛智地解脫道斷，斷已入無住地，無有出入。心處無在決定性地，其地清淨如淨琉璃，性常平等如彼大地，覺妙觀察如慧日光，利成得本如大法雨。入是智者，是入佛智地，入智地者，諸識不生。」

無住菩薩言：「如來所說，一覺聖力，四弘智地，即一切眾生本根覺利。何以故？一切眾生即此身中本來滿足。」佛言：「如是！何以故？一切眾生本

來無漏，諸善利本，今有欲刺，爲未降伏。」無住菩薩言：「若有眾生未得本利，猶有採集，云何降伏難伏？」佛言：「

若集若獨行，分別及以染，迴神住空窟，降伏難調伏；

解脫魔所縛，超然露地坐，識陰般涅槃。」

無住菩薩言：「心得涅槃，獨一無伴；常住涅槃，應當解脫。」佛言：「常住涅槃，是涅槃縛。何以故？涅槃本覺利，覺利本涅槃。涅槃覺分即本覺分，覺性不異，涅槃無異；覺本無生，涅槃無生；覺本無滅，涅槃無滅，本無異故。無得涅槃，涅槃無得，云何有住？善男子！覺者不住涅槃，何以故？覺本無生，離眾生垢；覺本無寂，離涅槃動。住如是地，心無所住、無有出入，入庵摩羅識。」

無住菩薩言：「庵摩羅識，是有入處，處有所得，是得法也。」佛言：「不也！何以故？譬如迷子，手執金錢而不知有。遊行十方經五十年，貧窮困苦，專事求索而以養身，而不充足。其父見子有如是事，而謂子言：『汝執金錢何不取用？隨意所須皆得充足。』其子醒已而得金錢，心大歡喜，而謂得錢。」

其父謂言：『迷子！汝勿欣懌，所得金錢是汝本物，汝非有得，云何可喜？』善男子！庵摩羅者亦復如是，本無出相，今即非入；昔迷故非無，今覺故非入。」

無住菩薩言：「彼父知其子迷，云何經五十年、十方遊歷、貧窮困苦，方始告言？」佛言：「經五十年者，一念心動；十方遊歷，遠行遍計。」無住菩薩言：「云何一念心動？」佛言：「一念心動五陰俱生，五陰生中具五十惡。」無住菩薩言：「遠行遍計，遊歷十方，一念心生，具五十惡。云何令彼眾生無生一念？」

佛言：「令彼眾生安坐心神，住金剛地靜念無起，心常安泰即無一念。」無住菩薩言：「不可思議！覺念不生，其心安泰，即本覺利。利無有動，常在不無，無有不無，不無不覺。覺知無覺，本利本覺，覺者清淨無染，不變不易；決定性故，不可思議。」佛言：「如是。」無住菩薩聞是語已，得未曾有，而說偈言：「

尊者大覺尊，說生無念法，無念無生心，心常生不滅。

一覺本覺利，利諸本覺者，如彼得金錢，所得即非得。」

爾時，大眾聞說是語，皆得本覺利般若波羅蜜。

〈入實際品〉第五

於是，如來作如是言：「諸菩薩等本利深入，可度眾生。若後非時，應如說法時利，不俱順不順說，非同非異，相應如說；引諸情智，流入薩婆若海。無令可眾挹彼虛風，悉令彼庶一味神乳，世間非世間，住非住處，五空出入無有取捨。何以故？諸法空相，性非有無，非無不無，不無不有，無決定性，不住有無；非彼有無凡聖之智，而能惻隱，諸菩薩等若知是利，即得菩提。」

爾時，眾中有一菩薩名曰大力，即從座起，前白佛言：「尊者！如佛所說，五空出入無有取捨。云何五空而不取捨？」佛言：「菩薩！五空者：三有是空，六道影是空，法相是空，名相是空，心識義是空。菩薩！如是等空，空不住空，空無空相；無相之法，有何取捨？入無取地，則入三空。」

大力菩薩言：「云何三空？」佛言：「三空者，空相亦空，空空亦空，所空亦空。如是等空，不住三相，不無真實，文言道斷，不可思議。」大力菩薩言：「不無真實，是相應有。」佛言：「無不住無，有不住有。不有之法，不即住無；不無之相，不即住有，非以有無而證得理。菩薩！無名義相，不可思議，何以故？無名之名，不無於名；無義之義，不無於義。」大力菩薩言：「如是名義，真實如相，如來如相，如不住如，如無如相，相無如故，非不如來。眾生心相，相亦如來；眾生之心，應無別境。」

佛言：「如是！眾生之心，實無別境。何以故？心本淨故，理無穢故；以染塵故，名爲三界。三界之心，名爲別境。是境虛妄，從心化生；心若無妄，即無別境。」大力菩薩言：「心若在淨，諸境不生。此心淨時，應無三界。」佛言：「如是，菩薩！心不生境，境不生心。何以故？所見諸境唯所見心，心不幻化則無所見。菩薩！內無眾生，三性空寂，則無已眾亦無他眾；乃至二入，亦不生心。得如是利，則無三界。」

大力菩薩言：「云何二入不生於心？心本不生，云何有入？」佛言：「二

入者：一謂理入、二謂行入。理入者，深信眾生不異真性，不一不共；但以客塵之所翳障，不去不來。凝住覺觀，諦觀佛性，不有不無，無己無他，凡聖不二。金剛心地，堅住不移，寂靜無爲，無有分別，是名理入。行入者，心不傾倚，影無流易，於所有處，靜念無求，風鼓不動，猶如大地。捐離心我，救度眾生，無生無相，不取不捨。菩薩！心無出入，無出入心，入不入故，故名爲入。菩薩！如是入法，法相不空。不空之法，法不虛棄。何以故？不無之法，具足功德，非心、非影，法爾清淨。」

大力菩薩言：「云何非心、非影，法爾清淨？」佛言：「空如之法，非意識法，非心使所有。法非空相，法非色相，法非心有，爲不相應法；非心、無爲，是相應法，非所現影、非所顯示，非自性、非差別，非名、非相、非義，何以故？如故。無如之法，亦無無如，無有無如，非無如有，何以故？根理之法，非理非根，離諸諍論，不見其相。菩薩！如是淨法，非生之所生，非滅之所滅。」

大力菩薩言：「不可思議！如是法相，不合成不獨成，不羈不絆，不聚不

散，不生不滅，亦無來相及以去相。不可思議！」佛言：「如是，不可思議！不思議心，心亦如是，何以故？如不異心，心本如故；眾生佛性，不一不異。眾生之性，本無生滅；生滅之性，性本涅槃。性相本如，如無動故，一切法相，從緣無起；起相性如，如無所動，因緣性相，相本空無。緣緣空空，無有緣起，一切緣法，惑心妄見。現本不生，緣本無故，心如法理，自體空無；如彼空王本無住處，凡夫之心妄分別見；如如之相本不有無，有無之相見唯心識。菩薩！如是心法，不無自體，自體不有，不有不無。菩薩！無不無相，非言說地，何以故？真如之法，虛曠無相，非二乘所及。虛空境界，內外不測，六行之士，乃能知之。」大力菩薩言：「云何六行？願爲說之。」佛言：「一者十信行，二者十住行，三者十行行，四者十迴向行，五者十地行，六者等覺行。如是行者，乃能知之。」

大力菩薩言：「實際覺利無有出入。何等法心得入實際？」佛言：「實際之法，法無有際，無際之心，則入實際。」大力菩薩言：「無際心智，其智無崖；無崖之心，心得自在；自在之智，得入實際。如彼凡夫軟心眾生，其心

多喘；以何法御，令得堅心，得入實際？」佛言：「菩薩！彼心喘者，以内外使，隨使流注，滴瀝成海，大風鼓浪，大龍驚駭，驚駭之心故令多喘。菩薩！令彼眾生存三守一，入如來禪；以禪定故，心則無喘。」

大力菩薩言：「何謂存三守一入如來禪？」佛言：「存三者，存三解脫；守一者，守一心如。入如來禪者，理觀心如，入如是地，即入實際。」大力菩薩言：「三解脫法是何等事？理觀三昧，從何法入？」佛言：「三解脫者，虛空解脫、金剛解脫、般若解脫。理觀心者，心如理淨，無可不心。」

大力菩薩言：「云何存用？云何觀之？」佛言：「心事不二，是名存用；內行外行，出入不二，不住一相。心無得失，一不一地，淨心流入，是名觀之。菩薩！如是之人，不住二相，雖不出家，不住在家故，雖無法服，不具持波羅提木叉戒，不入布薩，能以自心無爲自恣，而獲聖果。不住二乘，入菩薩道，後當滿地成佛菩提。」大力菩薩言：「不可思議！如是之人，非出家、非不出家，何以故？入涅槃宅，著如來衣，坐菩提座，如是之人乃至沙門宜應敬養。」佛言：「如是，何以故？入涅槃宅，心越三界；著如來衣，入法空

處；坐菩提座，登正覺地。如是之人，心超二乘，何況沙門而不敬養？」

大力菩薩言：「如彼一地及與空海，二乘之人爲不見也。」佛言：「如是，彼二乘人，味著三昧；得三昧身，於彼空海一地，如得酒病昏醉不醒，乃至數劫猶不得覺；酒消始悟，方修是行，後得佛身。如彼人者，從捨闍提即入六行，於行地所一念淨心，決定明白金剛智力，阿鞞跋致度脫眾生，慈悲無盡。」

大力菩薩言：「如是之人應不持戒，於彼沙門應不敬仰。」佛言：「爲說戒者，不善慢故、海波浪故。如彼心地，八識海澄、九識流淨，風不能動、波浪不起，戒性等空，持者迷倒。如彼之人，七六不生，諸集滅定，不離三佛而發菩提，三無相中順心玄入，深敬三寶，不失威儀，於彼沙門不無恭敬。菩薩！彼仁者不住世間動不動法，入三空聚滅三有心。」大力菩薩言：「彼仁者於果滿足德佛、如來藏佛、形像佛，如是佛所而發菩提心，入三聚戒；不住其相，滅三有心；不居寂地、不捨可眾，入不調地，不可思議。」爾時，舍利弗從座而起，前說偈言：「

具足般若海，不住涅槃城，如彼妙蓮華，高原非所出。
諸佛無量劫，不捨諸煩惱，度世然後得，如泥華所出。
如彼六行地，菩薩之所修；如彼三空聚，菩提之真道。
我今住不住，如佛之所說，來所還復來，具足然後出。
復令諸眾生，如我一無二，前來後來者，悉令登正覺。」

爾時，佛告舍利弗言：「不可思議！汝當於後成菩提道，無量眾生超生死海。」爾時，大眾皆悟菩提，諸小眾等入五空海。

《金剛三昧經》 卷下

〈真性空品〉 第六

爾時，舍利弗而白佛言：「尊者！修菩薩道無有名相，三戒無儀；云何攝受爲眾生說？願佛慈悲，爲我宣說。」佛言：「善男子！汝今諦聽，爲汝宣說。善男子！善不善法，從心化生；一切境界，意言分別，制之一處，眾緣斷滅，何以故？善男子！一本不起，三用無施；住於如理，六道門杜；四緣如順，三戒具足。」

舍利弗言：「云何四緣如順，三戒具足？」佛言：「四緣者：一謂作擇滅力取緣，攝律儀戒；二謂本利淨根力所集起緣，攝善法戒；三謂本慧大悲力緣，攝眾生戒；四謂一覺通智力緣，順於如住。是謂四緣。善男子！如是四大緣力，不住事相，不無功用，離於一處，則不可求。善男子！如是一事通

攝六行，是佛菩提薩婆若海。」

舍利弗言：「不住事相，不無功用，是法真空，常樂我淨。超於二我，大般涅槃；其心不繫，是大力觀。是觀覺中，應具三十七道品法。」佛言：「如是，具三十七道品法，何以故？四念處、四正勤、四如意足、五根、五力、七覺分、八正道等，多名一義，不一不異。以名數故，但名但字，法不可得。不得之法，一義無文，無文相義，真實空性。空性之義如實如如，如如之理具一切法。善男子！住如理者，過三苦海。」

舍利弗言：「一切萬法，皆悉言文；言文之相，即非爲義。如實之義，不可言說，今者如來云何說法？」佛言：「我說法者，以汝眾生，在生說故；說不可說，是故說之。我所說者，義語非文；眾生說者，文語非義。非義語者，皆悉空無；空無之言，無言於義。不言義者，皆是妄語；如義語者，實空不空；空實不實，離於二相，中間不中。不中之法離於三相，不見處所，如如說；如無無有，無有於無，如無有無，有無於有；有無不在，說不在故；不在於如，如不有如，不無如說。」

舍利弗言：「一切眾生從一闍提，闍提之心住何等位，得至如來、如來實相？」佛言：「從闍提心乃至如來、如來實相住五等位。一者信位，信此身中真如種子爲妄所翳，捨離妄心，淨心清白，知諸境界意言分別。二者思位，思者觀諸境界唯是意言，意言分別隨意顯現，所見境界非我本識，知此本識非法非義，非所取非能取。三者修位，修者常起能起，起修同時；先以智導，排諸障礙，出離蓋纏。四者行位，行者離諸行地，心無取捨，極淨根利，不動心如，決定實性，大般涅槃，唯性空大。五者捨位，捨者不住性空，正智流易，大悲如相，相不住如，三藐三菩提虛心不證，心無邊際，不見處所，是至如來。善男子！五位一覺從本入，若化眾生從其本處。」

舍利弗言：「云何從其本處？」佛言：「本來無本，處於無處，空際入實，發菩提心，而滿成聖道，何以故？善男子！如手執彼空，不得非不得。」舍利弗言：「如尊所說，在事之先，取以本利，是念寂滅，寂滅是如。總持諸德，該羅萬法，圓融不二，不可思議！當知是法即是摩訶般若波羅蜜，是大神咒、是大明咒、是無上咒、是無等等咒。」佛言：「如是、如是，真如空性，性空

智火燒滅諸結，平等平等。等覺三地，妙覺三身，於九識中皎然明淨，無有諸影。善男子！是法非因非緣，智自用故；非動非靜，用性空故；非有非無，空相空故。善男子！若化眾生，令彼眾生觀入是義，入是義者是見如來。」

舍利弗言：「如來義觀不住諸流，應離四禪而超有頂。」佛言：「如是！何以故？一切法名數，四禪亦如是；若見如來者，如來心自在，常在滅盡處，不出亦不入，內外平等故。善男子！如彼諸禪觀，皆爲想空定，是如非復彼，何以故？以如觀如，實不見觀如相諸相，相已寂滅，寂滅即如義。如彼想禪定，是動非是禪，何以故？禪性離諸動，非染非所染，非法非影，離諸分別，本義義故。善男子！如是觀定，乃名爲禪。」

舍利弗言：「不可思議！如來常以如實而化眾生。如是實義，多文廣義，利根眾生乃可修之，鈍根眾生難以措意。云何方便令彼鈍根得入是諦？」佛言：「令彼鈍根受持一四句偈，即入實諦。一切佛法，攝在一四偈中。」舍利弗言：「云何一四句偈？願爲說之。」於是，尊者而說偈言：「

因緣所生義，是義滅非生；滅諸生滅義，是義生非滅。」

爾時，大眾聞說是偈，僉大歡喜，皆得滅生、滅生般若性空智海。

〈如來藏品〉第七

爾時，梵行長者從本際起，而白佛言：「尊者！生義不滅，滅義不生，如是如義即佛菩提。菩提之性則無分別，無分別智分別無窮；無窮之相唯分別滅，如是義相不可思議，不思議中乃無分別。尊者！一切法數無量無邊，無邊法相一實義性唯住一性，其事云何？」佛言：「長者！不可思議！我說諸法爲迷者故，方便道故；一切法相一實義智，何以故？譬如一市開四大門，是四門中皆歸一市，如彼眾庶隨意所入，種種法味亦復如是。」

梵行長者言：「法若如是，我住一味，應攝一切諸味。」佛言：「如是，如是，何以故？一味實義如一大海，一切眾流無有不入。長者！一切法味猶彼眾流，名數雖殊，其水不異；若住大海則括眾流，住於一味則攝諸味。」梵行長者言：「諸法一味。云何三乘道其智有異？」佛言：「長者！譬如

江、河、淮、海，大小異故、深淺殊故、名文別故，水在江中名爲江水，水在淮中名爲淮水，水在河中名爲河水，俱在海中唯名海水。法亦如是，俱在眞如，唯名佛道。長者！住一佛道，即達三行。」

梵行長者言：「云何三行？」佛言：「一、隨事取行，二、隨識取行，三、隨如取行。長者！如是三行總攝眾門，一切法門無不此入。入是行者，不生空相；如是入者，可謂入如來藏；入如來藏者，入不入故。」

梵行長者言：「不可思議！入如來藏，如苗成實，無有入處。本根利力，利成得本，得本實際，其智幾何？」佛言：「其智無窮。略而言之，其智有四。何者爲四？一者定智，所謂隨如；二者不定智，所謂方便摧破；三者涅槃智，所謂慧除電覺；四者究竟智，所謂入實具足道。長者！如是四大事用，過去諸佛所說，是大橋梁，是大津濟。若化眾生，應用是智。」

「長者！用是大用，復有三大事。一者於三三昧內外不相奪，二者於大義科隨道擇滅，三者於如慧如定以悲俱利。如是三事，成就菩提；不行是事，則不能流入彼四智海，爲諸大魔所得其便。長者！汝等大眾，乃至成佛，常

當修習勿令暫失。」

梵行長者言：「云何三三昧？」佛言：「三三昧者，所謂空三昧、無相三昧、無作三昧，如是三昧。」梵行長者言：「云何於大義科？」佛言：「大謂四大，義謂陰界入等，科謂本識，是爲於大義科。」梵行長者言：「不可思議！如是智事，自利利人，過三界地，不住涅槃，入菩薩道。如是法相，是生滅法，以分別故；若離分別，法應不滅。」爾時，如來欲宣此義而說偈言：「法從分別生，還從分別滅，滅諸分別法，是法非生滅。」

爾時，梵行長者聞說是偈，心大欣懌，欲宣其義而說偈言：「

諸法本寂滅，寂滅亦無生，是諸生滅法，是法非無生。
彼則不共此，爲有斷常故，此則離於二，亦不在一住。
若說法有一，是相如毛輪，如焰水迷倒，爲諸虛妄故；
若見於法無，是法同於空，如盲無目倒，說法如龜毛。
我今聞佛說，知法非二見，亦不依中住，故從無住取。
如來所說法，悉從於無住，我從無住處，是處禮如來。

敬禮如來相，等空不動智，不著無處所，敬禮無住身。

我於一切處，常見諸如來，唯願諸如來，爲我說常法。」

爾時，如來而作是言：「諸善男子！汝等諦聽，爲汝眾等說於常法。善男子！常法非常法，非說亦非字，非諦非解脫，非無非境界，離諸妄斷際。是法非無常，離諸常斷見，了見識爲常，是識常寂滅，寂滅亦寂滅。善男子！知法寂滅者，不寂滅心，心常寂滅；得寂滅者，心常真觀，知諸名色，唯是癡心；癡心分別，分別諸法，更無異事出於名色。知法如是不隨文說，心心於義不分別我，知我假名即得寂滅。若得寂滅，即得阿耨多羅三藐三菩提。」

爾時，長者梵行聞說是語而說偈言：「
名相分別事，及法名爲三，眞如正妙智，及彼成於五。
我今知是法，斷常之所繫，入於生滅道，是斷非是常。
如來說空法，遠離於斷常，因緣無不生，不生故不滅。
因緣執爲有，如採空中華，猶如石女子，畢竟不可得。
離諸因緣取，亦不從他滅，及於己義大，依如故得實。」

是故眞如法，常自在如如，一切諸萬法，非如識所化。離識法即空，故從空處說，滅諸生滅法，而住於涅槃。大悲之所奪，涅槃滅不住，轉所取能取，入於如來藏。」

爾時大眾聞說是義，皆得正命，入於如來如來藏海。

〈總持品〉第八

爾時，地藏菩薩從眾中起至于佛前，合掌胡跪而白佛言：「尊者！我觀大眾心有疑事，猶未得決。今者如來欲爲除疑，我今爲眾隨疑所問，願佛慈悲垂哀聽許。」佛言：「菩薩摩訶薩！汝能如是救度眾生，是大悲愍不可思議。汝當廣問，爲汝宣說。」地藏菩薩言：「一切諸法云何不緣生？」爾時，如來欲宣此義，而說偈言：「若法緣所生，離緣可無法。云何法性無，而緣可生法？」爾時，地藏菩薩言：「法若無生，云何說法，法從心生？」於是尊者而說偈言：「是心所生法，是法能所取，如醉眼空華，是法然非彼。」

爾時，地藏菩薩言：「法若如是，法則無待；無待之法，法應自成。」於是尊者而說偈言：「法本無有無，自他亦復爾，不始亦不終，成敗則不住。」爾時，地藏菩薩言：「一切諸法相即本涅槃，涅槃及空相亦如是。無是等法，是法應如。」佛言：「無如是法，是法是如。」地藏菩薩言：「不可思議！如是如相，非共不共，意取業取，即皆空寂。空寂心法，俱不可取，亦應寂滅。」於是尊者而說偈言：「一切空寂法，是法寂不空，彼心不空時，是得心不有。」

爾時，地藏菩薩言：「是法非三諦，色空心亦滅，是法本滅時，是法應是滅。」於是尊者而說偈言：「法本無自性，由彼之所生，不於如是處，而有彼如是。」爾時，地藏菩薩言：「一切諸法無生、無滅。云何不一？」於是尊者而說偈言：「法住處無在，相數空故無，名說二與法，是則能所取。」

爾時，地藏菩薩言：「一切諸法相，不住於二岸，亦不住中流；心識亦如是。云何諸境界，從識之所生？若識能有生，是識亦從生。云何無生識，能生有所生？」於是尊者而說偈言：「

所生能生二，是二能所緣，俱本各自無，取有空華幻。

識生於未時，境不是時生，於境生未時，是時識亦滅。

彼即本俱無，亦不有無有，無生識亦無，云何境從有？」

爾時，地藏菩薩言：「法相如是，內外俱空。境智二眾，本來寂滅。如來所說實相真空，如是之法即非集也。」佛言：「如是。如實之法，無色無住，非所集非能集，非義非大，一本科法，深功德聚。」地藏菩薩言：「不可思議！不思議聚，七五不生，八六寂滅，九相空無，有空無有，無空無有。如尊者所說法義皆空，入空無行不失諸業；無我我所，能所身見、內外結使悉皆寂靜，故諸願亦息。如是理觀，慧定真如。尊者常說寔如空法，即良藥也。」

佛言：「如是，何以故？法性空故。空性無生，心常無生；空性無滅，心常無滅；空性無住，心亦無住；空性無爲，心亦無爲。空無出入，離諸得失，陰界入等皆悉亦無；心如不著，亦復如是。菩薩！我說諸空，破諸有故。」

地藏菩薩言：「尊者！知有非實如陽焰水，知實非無如火性生，如是觀者是人智也。」佛言：「如是，何以故？是人真觀，觀一寂滅，相與不相等以空，取以修空故，不失見佛；以見佛故，不順三流。於大乘中，三解脫道一體無

性，以其無性故空；空故無相，無相故無作，無作故無求，無求故無願；以是業，故淨心；以心淨故見佛，以見佛故當生淨土。菩薩！於是深法三化勤修，慧定圓成，即超三界。」

地藏菩薩言：「如來所說無生無滅，即是無常；滅是生滅，生滅滅已，寂滅爲常，常故不斷，是不斷法。離諸三界動不動法，於有爲法，如避火坑。依何等法而自呵責，入彼一門？」佛言：「菩薩！於三大事呵責其心，於三大諦而入其行。」地藏菩薩言：「云何三事而責其心？云何三諦而入一行？」佛言：「三大事者，一謂因，二謂果，三謂識。如是三事，從本空無，非我真我，云何於是而生愛染？觀是三事，爲繫所縛飄流苦海，以如是事，常自呵責。三諦者：一謂菩提之道，是平等諦，非不平等諦；二謂大覺正智得諦，非邪智得諦；三謂慧定無異行入諦，非離行入諦。以是三諦而修佛道，是人於是法無不得正覺。得正覺智，流大極慈，已他俱利，成佛菩提。」

地藏菩薩言：「尊者！如是之法則無因緣；若無緣法，因則不起。云何不勸法得入如來？」爾時，如來欲宣此義，而說偈言：「

一切諸法相，性空無不動，是法於是時，不於是時起。法無有異時，不於異時起，法無動不動，性空故寂滅。性空寂滅時，是法是時現，離相故寂住，寂住故不緣。是諸緣起法，是法緣不生，因緣生滅無，生滅性空寂。緣性能所緣，是緣本緣起，故法起非緣，緣無起亦爾。因緣所生法，是法是因緣，因緣生滅相，彼則無生滅。彼如真實相，本不於出沒，諸法於是時，自生於出沒。是故極淨本，本不因眾力，即於後得處，得得於本得。」

爾時，地藏菩薩聞佛所說心地快然，時諸眾等無有疑者；知眾心已，而說偈言：「

我知眾心疑，所以殷固問，如來大慈善，分別無有餘。是諸二眾等，皆悉得明了，我今於了處，普化諸眾生。如佛之大悲，不捨於本願，故於一子地，而住於煩惱。」

爾時，如來而告眾言：「是菩薩者不可思議，恒以大慈拔眾生苦。若有眾

生持是經法、持是菩薩名，即不墮於惡趣，一切障難皆悉除滅。若有眾生持此經者無餘雜念，專念是經如法修習；爾時菩薩常作化身而為說法，擁護是人終不暫捨，令是人等速得阿耨多羅三藐三菩提。汝等菩薩若化眾生，皆令修習如是大乘決定了義。」

爾時，阿難從座而起，前白佛言：「如來所說大乘福聚，決定斷結，無生覺利，不可思議。如是之法，名為何經？受持是經得幾所福？願佛慈悲，為我宣說。」佛言：「善男子！是經名者不可思議，過去諸佛之所護念，能入如來一切智海。若有眾生持是經者，則於一切經中無所怖求。是經典法總持眾法，攝諸經要；是諸經法，法之繫宗。是經名者，名『攝大乘經』、又名『金剛三昧』、又名『無量義宗』。若有人受持是經典者，即名受持百千諸佛如是功德，譬如虛空無有邊際不可思議，我所囑累唯是經典。」

阿難言：「云何心行、云何人者受持是經？」佛言：「善男子！受持是經者，是人心無得失，常修梵行。若於戲論，常樂靜心；入於聚落，心常在定；若處居家，不著三有。是人現世有五種福：一者眾所尊敬，二者身不橫夭，

三者辯答邪論，四者樂度眾生，五者能入聖道。如是人者受持是經。」

阿難言：「如彼人者，度諸眾生，得受供養不？」佛言：「如是人者，能爲眾生作大福田，常行大智，權實俱演，是四依僧。於諸供養，乃至頭目髓腦，亦皆得受，何況衣食而不得受？善男子！如是人者，是汝知識，是汝橋梁，何況凡夫而不供養？」阿難言：「於彼人所受持是經、供養是人，得幾所福？」佛言：「若復有人，持以滿城金銀而以布施，不如於是人所受持是經一句偈，不可思議，善男子！令諸眾生持是經者，心常在定，不失本心；若失本心，即當懺悔。懺悔之法是爲清涼。」阿難言：「懺悔先罪不入於過去也。」佛言：「如是，猶如暗室，若遇明燈，暗即滅矣。善男子！無說悔先所有諸罪，而以爲說入於過去。」

阿難言：「云何名爲懺悔？」佛言：「依此經教入真實觀，一入觀時諸罪悉滅，離諸惡趣，當生淨土，速成阿耨多羅三藐三菩提。」佛說是經已，爾時阿難及諸菩薩、四部之大眾，皆大歡喜，心得決定，頂禮佛足，歡喜奉行。

金剛三昧經

出版者：佛教正覺同修會

地址：103 台北市承德路三段二七七號九樓

電話：總機〇一一 25957295（夜間）

傳真：〇一一 25954493

郵政劃撥帳號：一九〇七二三四三

帳號：〇四六〇〇一九〇〇一七四臺灣銀行民權分行

公元二〇二四年十二月 恭印四千二百冊

